

## В ЧЕТВЕРТОК 2-Я СЕДМИЦЫ ВЕЧЕРА.

На Господи воззвах, поставим стихов 6,

И поем настояция подобны три трипеснца, господина Иосифа. Глас 4.

Подобен: Дал еси знамение:

**В** ребра прободен, и на Древе повешен, \* жизнь мне источил еси, \* злобою змия, \* древа снадением умерщвленному. \* Темже славлю Тя Христе, \* и молю благоутробие Твое: \* страstem и востанию поклонника мя покажи, \* умилением совершающа постное поприще.

**Б**олезнь обравша от сада, \* первосозданнаго от рая изгнал еси: \* пригвоздився же яко Человек Спасе на Древе, \* сего вводиши. \* Темже Ти зову Избавителю: \* от болезней моих ныне мя исхити, \* постом очистив мя, \* и покаянием и слезами, \* Иисусе Преблагий, Спасе душ наших.

Ина стихира подобна, глас 5, господина Феодора:

Подобен: Господи, при Моисеи:

**Г**осподи, животворящий Твой Крест воспеваем: \* сей бо жизнь в мире процвете, \* смерть умертвив: \* егоже Тебе и ныне в молитву приводим: \* во днех святых укрепи ны постящияся, \* и даруй на страсти крепость, \* и мира победное, \* за множество милости Человеколюбче.

И Миней 3. Слава, и ныне, Богородичен.

Прокимен, псалом 35, глас 4: Господи, на небеси милость Твоя, и истина Твоя до облак.

Стих: Правда Твоя яко горы Божия: судьбы Твоя бездна многа.

Бытия чтение. [Глава 5, ст. 1 – 24.]

**С**ия книга бытия человека, воньже день сотвори Бог Адама: по образу Божию сотвори его. Мужа и жену сотвори их, и благослови их: и нарече имя ему Адам, воньже день сотвори их. Поживе же Адам лет двесте тридесять, и роди сына по виду своему, и по образу своему: и нарече имя ему Сиф. Быша же дние Адамовы, яже поживе, по еже родити ему Сифа, лет семь сот, и роди сыны и дщери. И быша вси дние Адамовы, яже поживе, лет девять сот и тридесять: и умре. Поживе же Сиф лет двесте пять, и роди Еноса: И поживе Сиф, по еже родити ему Еноса, лет семь сот и семь, и роди сыны и дщери. И быша вси дние Сифовы, лет девять сот и дванадесять: и умре. И поживе Енос лет сто девятьдесят, и роди Каинана: И поживе Енос, по еже родити ему Каинана, лет семь сот и пятнадцать, и роди сыны и дщери. И быша вси дние Еносовы лет девять сот и пять: и умре. И поживе Каинан лет сто семьдесят, и роди Малелеила. И поживе Каинан, по еже родити ему Малелеила, лет семь сот и сорок, и роди сыны и дщери. И быша вси дние Каинановы, лет девять сот и десять: и умре. И поживе Малелеил лет сто шестьдесят пять, и роди Иареда. И поживе Малелеил, по еже родити ему Иареда, лет семь сот и тридесять, и роди сыны и дщери. И быша вси дние Малелеиловы, лет осмь сот и девятьдесят пять: и умре. И поживе Иаред лет сто шестьдесят два, и роди Еноха. И поживе Иаред, по еже родити ему Еноха, лет осмь сот, и роди сыны и дщери. И быша вси дние Иаредовы лет девятьсот и шестьдесят два: и умре. И поживе Енох лет сто шестьдесят пять, и роди Мафусала.

Угоди же Енох Богу, и поживе Енох, по еже родити ему Мафусала, лет двесте, и роди сыны и дщери. И быша вси дние Еноховы лет триста шестьдесят пять. И угоди Енох Богу, и не обретаешя, зане преложи его Бог.

**Прокимен, псалом 36, глас 6: Потерпи Господа, и сохрани путь Его.**

**Стих: Не ревнуй лукавнующим, ниже завиди творящим беззаконие.**

**Притчей чтение. [Глава 6, ст. 3 – 20.]**

Твори сыне, яже аз заповедую ти, и спасайся: идеши бо в руже злых за твоего друга, буди не ослабевая: поощряй же и твоего друга, егоже испоручил еси. Не даждь сна твоима очима, ниже да воздремлеши твоима веждама: Да спасешися аки серна от тенет, и яко птица от сети. Иди ко мравию, о лениве, и поревнуй, видев пути его, и буди онаго мудрейший. Он бо не сушу ему земледельцу, ниже нудящаго его имущий, ниже под владыкою сый, Готовит в жатву пищу, и многое в лето творит уготовление. или иди ко пчеле, и увеждь, коль делательница есть, делание же коль честное творит: еяже трудов царие и простии во здравие употребляют, любима же есть всеми и славна: аще силою и немощна сущи, [но] премудростию почтена произведется. Доколе, о лениве, лежиши? когда же от сна востанеши? Мало убо спиши, мало же седиши, мало же дремлеши, мало же объемлеши перси рукама: Потом же найдет тебе аки зол путник убожество: скудость же аки благий течец. аще же не ленив будеши, придет яко источник жатва твоя, скудость же аки злый течец [от тебе] отбежит. Муж безумен и законопреступный ходит в пути не благи: Тойже намизает оком, и знамение дает ногою, учит же помаванием перстов. Развращенно же сердце кует злая: на всякое время таковой мятежы составляет граду. Сего ради внезапно приходит ему погибель, разсечение и сокрушение неисцельное. Яко радуется о всех, ихже ненавидит Бог: сокрушается же за нечистоту души. Око досадителя, язык неправедный, руже проливающия кровь праведнаго: И сердце кующее мысли злы, и нозе тщашися зло творити, потребятся. Разжизает лжи свидетель неправеден, и насылает суды посреде братьий. Сыне, храни законы отца твоего, и не отрини наказания матере твоея.

**На стиховне самогласен дне. Глас 5.**

Не постившися по заповеди Создавшаго, \* от сада разума первозданнии, \* смерть от преслушания приплодиша, \* древа же жизни и райския сладости устранившися. \* Темже постимся вернии от пицей тленных, \* и страстей всегубительных, \* да от Божественнаго Креста жизнь обыдем, \* и со благоумным разбойником \* к начальному отечеству возвратимся, \* приемлюще от Христа Бога велию милость.

**Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: \* тако очи наши ко Господу Богу нашему, дондеже ущедрит ны.**

Не постившися по заповеди Создавшаго, \* от сада разума первозданнии, \* смерть от преслушания приплодиша, \* древа же жизни и райския сладости устранившися. \* Темже постимся вернии от пицей тленных, \* и страстей всегубительных, \* да от Божественнаго Креста жизнь обыдем, \* и со благоумным

разбойником \* к начальному отечеству возвратимся, \* приемлюще от Христа Бога велию милость.

**Стих 2:** Помилуй нас Господи, помилуй нас, яко по многу исполнихомся уничижения: напаче наполнися душа наша поношения гобзующих, \* и уничижения гордых.

**Мученичен:** О земных всех нерадивше, \* и на муки мужески дерзнувшы, \* блаженных надежд не погрешите, \* но Небесному Царствию наследницы бысте, \* всехвальнии мученицы, \* имуще дерзновение к Человеколюбцу Богу, \* мир мирови испросите, \* и душам нашим велию милость.

**Слава, и ныне, Крестобогородичен.**

**Подобен:** Радуйся постником:

**Агница** Своего, Агница иногда \* зряци к заколению тщащася, \* усердно последоваше, \* сия вопиющи Ему: \* камо идеши Чадо мое сладчайшее Христе, \* чесо ради скорое течение сие, \* Долготерпеливе, течещи неленостно? \* Иисусе возжеленнейший безгрешне, \* многомилостиве Господи, \* даждь Ми слово Рабе Твоей, \* Сыне Мой вселюбезнейший, \* не презри Мене Щедре молча, \* Тя странно рождшую, \* Боже Всещедре, даруй мирови велию милость.

## **В ПЯТОК 2-я СЕДМИЦЫ, НА УТРЕНИ ТРОИЧНЫ .**

По 1-м стихословии седальны Крестны Осмогласника, с Богородичным.

По 2-м же стихословии глаголем настояция седальны, глас 4.

**Подобен:** Скоро предвари:

**П**ощением возвышающеся \* от земноревнительных страстей \* вознесем Господа вознесшагося на Крест, \* и мир возвысившаго. \* Пийм во чувстве умиления питие, \* примем день во уме и час, \* воньже вечному Судии предстанем. [Дважды.]

**Крестобогородичен. Подобен:**

**Б**езвестная Мати Твоя, \* яко виде на Крест Тя возвышаема, \* рыдаючи и плачуци сицевая глаголаше: \* что новое и странное сие Сыне Мой чудо? \* како Тя беззаконный народ ко Кресту пригвождает, \* всех Тя жизнь, света Моего сладчайшаго?

По 3-м стихословии седален господина Феодора, глас 5.

**Подобен:** Сияет днесь:

**С**ияет Господи, благодать Креста Твоего, \* всю вселенную облистающая, \* крепость бесовскую потребляет, \* и пощения течение ныне благоукрашает: \* в немже укрепляя, помилуй нас. [Дважды.]

**Крестобогородичен, глас тойже.**

**Подобен:** Собезначальное:

**В**ознесена на Древе яко виде, \* рождающая Тя Мати кроме болезней, \* и рыдаше с плачем, и зываше: \* увы Мне сладчайший Сыне, \* уязвляюся ныне душею, \* на Кресте зрящи Тя, \* посреде двою злодею, \* аки злодея пригвождаема.

**Канон Минеи, и настояция трипеснцы по чину их, господина Иосифа. И стихословится песнь. Глас 4.**

**Песнь 5.**

**Ирмос: Нечестивии не узрят славы Твоея Христе ...,**

**В**олею Владыко вознесся еси на Крест, и низверг еси врага: темже волею низвержена мя похотьми в пропасть, благоутробием Твоим исправи.

**О**мрачена мя страстьми безместными душею, просвети Иисусе, омрачивый солнце на Кресте простерся, и просветивый вся вселенныя исполнения.

**П**остную пучину преплыти тихо сподоби мя Христе, утишая волны мысли моя, и в пристанища Воскресения окорми.

**Богородичен: Ч**истую чистотствующим почтим умом, доброту Иаковлю, Божественными деяньми украшающеся, благочестно воспоим, яко Матерь Бога нашего.

**Иный трипеснец господина Феодора, глас 5.**

**Ирмос: От ноци покланяющиеся ...,**

**Т**ы распенся тления избавляеши мя, и прободен быв обезсмертствуеши мя: славаю Твою неизреченную милость, яко пришел еси Христе, да спасеши мя.

**На** Кресте простер длани Твоя, мысленного Амалика убил еси, люди Твоя спасаей Господи. Сего ради поем державу Твою.

**Троицен:** В трех Лицах Божество, едино начало всепресущное, воспоим Отца безначального, и Сына, и Духа Святаго.

**Богородичен:** Егоже небо вместити не можаше, Ты во чреве заченши родила еси. О страннаго и неизреченнаго чудесе! Темже Тя вси поем Пречистая.

Слава Тебе Боже наш, слава Тебе.

Мене ради претерпевый распятие, оцет пивый, и рекий: совершишася! соверши мое постное поприще, удостояя мя видети Твое востание.

**Катавасия:** От нощи покланяющияся Тебе Христе \* помилуй и мир даруй: \* зане свет повеления Твоя, \* быша исцеления рабом Твоим Человеколюбче.

### Песнь 8.

**Ирмос:** Отроки благочестивыя ...,

**На** Кресте пригвождься за благоутробие, разбойнику рай отверзл еси: ныне же разбиена мя демонскою лютостию, и в души всеплотную язву приимша уврачуй, отверзая ми двери покаяния Твоим человеколюбием.

**Постом** просветивше плоть, душу добродетельми утучним, убогия напитаим, богатство неистощимое на небесех купующе, и воззовем: Господа пойте дела и превозносите Его во веки.

**Страстию** Твоею тварь поколебася, на Кресте Тя видевше пригвождаема, Спасе Преблагий. Темже молю Тя, прилоги колеблемый присно змииными, утверди ум мой Щедре, на твердем камени Твоих хотений.

**Богородичен:** Двере Божия заключена, еюже един пройде Господь, направи мя к стезям Божественным, и отверзи ми спасения двери, Богоблагодатная: к Тебе бо прибегаю Дево, единой предстательнице рода человеческого.

### Иный.

**Ирмос:** Творца твари, \* Егоже ужасаются ангели, \* пойте людие, \* и превозносите во вся веки.

**Древо** всесвятое, на немже Ты Христе мой распялся еси, поя преблагословлю Тя во вся веки.

**На** Голгофе, беззаконнии Тя Христе, распенше убиша: но живещи, и спасаещи нас во веки.

Благословим Отца, и Сына, и Святаго Духа, Господа.

**Троицен:** Страннолепно разделяется Троица, и пребывает нераздельна, яко Бог, Егоже превозносим во вся веки.

**Богородичен:** Молитву сотвори о поющих Тя Пречистая, избавитися всяких искушений и бед.

Слава Тебе Боже наш, слава Тебе.

**Креста** Твоего Господи, силою вжилив мя, сподоби благодушно скончати поста течение.

Хвалим, благословим, покланяемся Господеви, поюще и превозносяще во вся веки.

**Катавасия:** Творца твари, \* Егоже ужасаются ангели, \* пойте людие, \* и превозносите во вся веки.

### Песнь 9.

**Ирмос:** Камень нерукосечный от несекомья горы ...,

Камень Тя отсеченный провиде пророк, от горы Девы Спасе, сокрушившаго камень Твоим распятием. Темже отягчена мя нечувствия камением, яко Всещедрый, свободи.

Постися от злобы душе моя, Божественною любовию наслаждающихся, двери отверзи всяким благим видом, заграждаючи лукавства вход, воздержанием и молением.

Мене осужденаго спаси, осудивый Крестом Твоим Владыко Спасе мой вражду, и да не покажеши геенне повинна, оскверненаго страстьми, и грехми омраченаго.

**Богородичен:** Пощади мя Христе, егда приидеши судити миру со славою, разреши мглу злоб моих, мольбами Рождшия Тя, и наследника сотвори Небеснаго Царствия Твоего.

### Иный.

**Ирмос:** Исаие ликуй, \* Дева име во чреве \* и роди Сына Еммануила, \* Бога же и Человека, \* Восток имя Ему: \* Егоже величающе, \* Деву ублажаем.

Паки рай отверзаеши единою распеня, в немже причащаяся жизни радуясь, смерти избавляясь вечныя преслушания: темже Человеколюбче, яко Бога моего величаю Тя.

Клятвы орган, благословения показася печать, Твой животворный Господи Крест, на немже Тя взирающе, оживляемся умершии прежде, и воспевающе Тя, яко Владыку величаем.

**Троицен:** Едину Существом воспеваю Тя безначальная Троице честная, живоначальная, несекомая Единице, Отче нерожденный, и рожденный Слове и Сыне, Душе Святой, спаси ны поющия Тя.

**Богородичен:** Паче ума Рождество Твое Богомати, без мужа бо зачатие в Тебе, и девственно рождение бысть, ибо Бог есть рождейся: Егоже величающе, Тя Дево ублажаем.

Слава Тебе Боже наш, слава Тебе.

Кресте честный, крепосте моя и прибежище, буди ми просвещение ныне воздержательно, веселя и очищая мя, избавляя от искушений: да прославляя тебе, Владыку величаю Христа.

**Катавасия:** Исаие ликуй, \* Дева име во чреве \* и роди Сына Еммануила, \* Бога же и Человека, \* Восток имя Ему: \* Егоже величающе, \* Деву ублажаем.

### Светилен гласа.

На стиховне самогласен, дважды, глас 8:



Страстоубийца пост настоящий, \* озлобленные от греха уврачевати обещаваются: \* егоже яко богоданного помощника почтим, \* богописанные скрижали Моисеом приемше. \* Не предызберем сокрушившаго их невоздержанием: \* не будем общницы, \* ихже тела падоша в пустыни: \* не возсетуим иудейски, \* но церковно просветимся: \* не фарисейски лицемеруим, \* но евангельски удобримся, \* хвалящиеся о Кресте Христа, Избавителя душ наших.

**Стих:** Исполнимся завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Страстоубийца пост настоящий, \* озлобленные от греха уврачевати обещаваются: \* егоже яко богоданного помощника почтим, \* богописанные скрижали Моисеом приемше. \* Не предызберем сокрушившаго их невоздержанием: \* не будем общницы, \* ихже тела падоша в пустыни: \* не возсетуим иудейски, \* но церковно просветимся: \* не фарисейски лицемеруим, \* но евангельски удобримся, \* хвалящиеся о Кресте Христа, Избавителя душ наших.

**Таже стих:** И буди светлость Господа Бога нашего на нас, и дела рук наших исправи на нас, и дело рук наших исправи.:

**Мученичен:** Что вы наречем святии? \* херувимы ли? яко на вас почил есть Христос. \* Серафимы ли? яко нерестанно прослависте Его. \* Ангелы ли? тела бо отвратистесь. \* Силы ли? действуете бо чудесы. \* Многая ваша имена, и большая дарования: \* молитесь спаситися душам нашим.

**Слава и ныне, Крестобогородичен, глас тойже:**

Что чудное и изящное? \* Дева Господеви вопияше матерски: \* болезни, ихже не имех внегда родити Тя Сыне, \* острии касаются сердца Моего. \* Не терплю на Кресте пригвождена Тя зрящи, \* свете очию Моею: \* потщися убо востани, \* яко да прославлю \* с миром ужасное смотрение Твое.

## НА 6-М ЧАСЕ

Тропарь пророчества, глас 1:

**В** нощи и во дни припадаем Тебе Господи, \* подати оставление грехов душам нашим, \* да в мире поклонимся Тебе, \* и славословим Человеколюбче.

Прокимен, псалом 37, глас 4: Господи, да не яростию Твоею обличиши мене, ниже гневом Твоим накажеш мене.

Стих: Яко стрелы Твоя унзоша во мне.

Пророчества Исаиина чтение. [Глава 7, ст. 1 – 14.]

**Б**ысть во дни Ахаза сына Иоафамля, сына Озии, царя Иудина, взыде Расин царь Арамль, и Факей сын Ромелиев, царь Израилев на Иерусалим воевати на него, и не возмогоша разорити его. И возвестися в дому Давидове, глаголя: совеща Арам со Ефремом. и ужасеся душа его, и душа людей его: якоже в дубраве древо ветром восколеблется. И рече Господь ко Исаии: изыди во сретение Ахазу, ты, и оставшийся Иасув сын твой, к купели горняго пути, села белильничя. И речеши ему: блюди еже молчати, и не бойся, ниже душа твоя да изнеможет о двою древу главень дымящихся сих: егда бо гнев ярости Моея будет, паки исцелю. Сын же Арамль, и сын Ромелиев, яко совещаста совет лукавый на тя, глаголюще: Взыдем во Иудею, и беседовавшие с ними отвратим я к нам, и воцарим в ней сына Тавеилева. Сия же глаголет Господь Саваоф, не пребудет совет сей, ниже сбудется: По глава Араму Дамаск, и глава Дамаску Расин: но еще шестьдесят и пять лет, оскудеет царство Ефремово от людей. Глава же Ефремови Соморон, и глава Соморону сын Ромелиев: и аще не уверите, ниже имате разумети. И приложи Господь глаголати ко Ахазу, рекий: Проси себе знамения от Господа Бога твоего во глубину, или в высоту. И рече Ахаз: не имам просити, ниже искушу Господа. И рече [Исаиа] слышите убо доме Давидов, еда мало вам есть труд даяти человеком, и како даете Господеву труд? Сего ради даст Господь Сам вам знамение.

Прокимен, псалом 38, Глас 6: Услыши молитву мою Господи, и моление мое внуши.

Стих: Рех: сохранию пути моя, еже не согрешати ми языком моим.